

欽定大清會典事例

欽定大清會典事例卷二百七

戶部

漕運

優恤運軍

徵收例禁

重運例禁

優恤運軍○康熙二十年議准漕船凍阻將通濟庫銀借給仍令總漕將應給漕贈銀照數扣解補還原項○三十五年題准江淮興武二衛漕船凍阻不能回南動支通濟庫銀每船給銀二十兩速催回次仍令總漕於漕贈銀內扣解還款○四十六年議准各省領運運軍限內過淮抵通照數全完者令總漕賞給花紅以示鼓

勵如抵通交糧於額糧之外有領運三年陸續
多交米至百石者倉場咨部註冊領運六年多
交米至二百石者給以九品頂戴榮身如有運
軍運米至二十年雖無多交之米並無挂欠及
過犯事故者倉場侍郎咨部亦給以九品頂戴
榮身○六十年議准漕船回空凍阻暫動東省
藩庫銀每船借給八兩於六十一年各該糧道
應給運軍月糧內坐扣移解東省還項○又議
准到淮各幫漕船因雇募民船諸費浩繁借給
河庫帑銀作民船口糧水腳之用江安漕船每

船借銀五十兩。蘇松漕白船每船借銀四十兩。江西漕船每船借銀三十兩。浙江漕白船每船借銀五十兩。均於次年運軍應領行月銀米內扣還。○雍正元年議准各省完糧各軍並守凍完糧軍船每船正軍一名賞給銀二兩。又山東張秋臨清一帶地方浙江江西江南等省幫船運軍頭舵工等守凍不能回次量支藩庫銀四千兩。每船給銀六兩。○六年奏准回空漕船過淮安關頭工舵工水手人等零星捎帶梨棗六十石以下者免其報稅其餘貨物仍照例籤量。

按貨納稅經許野關所帶梨棗及應上稅之物

仍令輸稅○七年

諭運軍駕運辛苦若就糧艘之便順帶貨物至京貿易以獲利益亦情理可行之事著於舊例六十石之外加增四十石永著為例○八年題准各船頭工舵工二人每人帶土宜三石水手無論人數每船帶土宜二十石合算每船帶土宜共百二十六石○九年議准河東二省截留存賸漕米三十萬石議令原船運通輓輸上下倍為勞苦按道里之遠近時日之多寡酌議在德州往返者每船

給銀二十八兩三錢八分。在臨清往返者。每船給銀三十九兩三錢五分有奇。共四百十有九船。給銀萬四千九百四十二兩一錢有奇。再在德州往返各船。先經兩次借給。每船共銀三十八兩。今每船多給銀九兩六錢二分有奇。共多給銀千三百五十六兩一錢六分。免其扣追。

十三年

諭湖南明歲應運漕糧。已經截留為黔省賑濟之用。定例漕船停運之年。給運軍一半月糧。以為養贍。朕思各船水手。均由運軍雇募。多係別省貧民。今湖南漕

運既停各水手等在異鄉之業未免歸費無資著湖南巡撫於本年回空漕船抵次之日就近驗明各水手內有別處民人即量給盤費資助令回原籍毋令逗遛滋事○乾隆元年題准湖南湖北二省截留漕船因灣泊岳次濱臨洞庭風波不測與各省不同於支給一半月糧之外酌留頭舵二名水手二名每名日給米一升其餘水手資助回籍每名每站給盤費銀三分米一升照時價折給○四年題准各省重運漕船例帶土宜百二十六石向因各項貨物麤細不同按石計算漫無一

定嗣後分別貨物麤細酌量捆束大小定數作石。於過淮處立榜曉諭。如有違例裝載。以及書役人等稽延勒索。嚴加究處。○七年奏准安徽蘇松浙江三省截留漕船。於定例停給一半月糧項內。再照浙例減半賞給。○又

諭。今年漕船北上時。值河水淺涸。各船盤剝加絳繁費實多。借支庫項以作歸途使用。江西南昌等幫借銀四千四百兩。江南興武等幫借銀千七百四兩。揚州等幫借銀千七百九十二兩。均著加恩賞給。免其扣還。○十年奏准首進幫船。每年五六月間回空之時。

尚無梨棗可帶。以致不能均霑利澤。嗣後回空糧船行至山東。如無梨棗可帶。即將核桃瓜子柿餅等物攜帶六十石。以抵梨棗之數。儻逾六十石者。按例徵收稅銀。○十一年

諭停運漕船。例給一半月糧。以資苦蓋。上年兩江被水。朕降旨蠲緩。並截留漕糧。以備賑恤之用。其減歇軍船。自應照例支給。但念該地方被災之後。軍力未免艱難。一半月糧。慮不敷用。著加恩於常例五分之一外。增給二分。俾窮軍不致拮据。○十三年

諭本年四月初間。湖南江西運船於桃源宿遷地方遭

風沈溺重船五十隻。所有虧折米數。例應運軍買補。其船亦應賠造。但念窮軍力量艱難。若令一時賠補。難免拮据。著加恩軫恤。其船已滿年限者。照例給價。成造。未滿年限者。於道庫內借給。令其及早成造。限以三年陸續還款。以紓軍力。○二十年議准。運軍出運二十年。並無挂欠。過犯例。應請給頂戴。但有由糧道詳咨者。有赴坐糧廳呈報倉場覈咨者。事不畫一。嗣後俱令呈報糧道確查。詳報總漕衙門。移咨戶部倉場覈咨。○二十五年議准。漕船回空。經過山東。如逢梨棗核桃瓜子四項。尚

未貨賣之時即買帶黃豆瓜果等食物總以六十石抵數如有多帶即行徵稅○三十六年

諭本年後進各幫糧船沿途節次稽阻抵壩較遲回空食用不無稍有拮据向例有三升八合餘米應隨正交倉暫行緩交俟下運照數搭解俾旗丁等飯食有資以示體恤○五十年覆准河南省後幫停減船隻共領過三修銀九十兩領銀修艙在先奉文停減在後免其追繳○五十二年奏准浙江省台州前等九幫回空船在山東省陽穀東阿等處凍阻不能歸次每船借給銀二十兩○五十四

年奏准山東河南江南浙江四省船隻行走迅速較上年抵通日期早至數十日不等舵丁人等酌量加賞每正丁一名給銀一兩舵工一名給銀五錢其失風拆板糧米灑帶之丁舵概行扣除又例不回空之雇募買補及留通變賣各船扣除舵工止賞正丁以歸覈實○五十八年諭向來各省漕運船隻遲緩貽誤者俱交部議處示懲今行走迅速其運弁旗丁等交該撫查明分別賞賚以示鼓勵○又議准漕船抵通迅速領運千總每員賞銀二兩不給議敘軍船正丁每名賞銀一兩

○嘉慶二年覆准鳳中二幫旗下應追行月銀米。因原裝米石灑帶各丁已經全完。所支銀米亦經分給各丁。照案免其追繳。○四年

諭。向來漕船准帶土宜一百二十六石。例不報稅。原為恤丁起見。今著加恩准其多帶土宜二十四石。共足一百五十石之數。俾旗下等沿途更資霑潤。○五年諭。江西各幫旗下向於額領公款之外。每向糧道衙門借領銀兩以資辦公。現在按款清查。歷年共欠銀八千六百六十兩零。俱係歷任糧道自行挪借。以該丁等積年拖欠追繳無著。歷任糧道本有應得之咎。惟

閱年已久。官非一任。姑免深究。所有各幫船積欠銀兩。俱著加恩豁免。○又奏准各省回空船隻。例帶土宜六十石外。照重運多帶土宜二十四石。以資運費。○六年

諭金山等四幫各丁。有挂欠漕糧。分別杖責。著追運弁議處。本屬照例辦理。但念本年天津一帶水勢過大。丁船守水日久。未免多費食米。其挂欠尚屬有因。著加恩將該丁等挂欠米二千三百六十一石。准其以本年應交三升八合餘米。暫抵欠項。下年全數搭運。此外再有不敷。即買補本色交納。其旗丁杖責運弁

議處並著加恩寬免○十一年

諭湖北襄陽衛回空軍船於乾隆五十六年因民船失火延燒官給料價並照例在於積存款內津貼銀一千兩支給成造經該部以並非大造之期不應支給津貼節次查追固屬按例辦理但念該軍船前次延燒已屬意外被累現經查明該旗丁實係赤貧事經十餘年無力措完著加恩將前項津貼銀一千兩免其追繳○十二年定漕船被火延燒斃命之副丁應得卹賞銀兩查照原題照數給發

徵收例禁○順治九年題准運軍行糧應給本

色有違例折銀者。縣官與運弁皆嚴提究擬。○
十二年題准。兵道知府職不司漕。有借驗糧名
色苛索者。官即指叅。胥役究治。○十三年奏准。
漕糧開徵之時。如有州縣蠹役包攬代完。及飛
派無辜者。即行指叅。○十五年議准。州縣拖欠
漕項錢糧。該管監兌糧道等官。嚴檄行催。不得
差役致滋勒索。違者指叅。○又題准。運軍子弟
及積年舊役。有謀充有漕各衙門書承者。令總
漕及督撫嚴查。從重治罪。如本官失於覺察。及
徇庇容隱者。分別叅處。○十六年題准。州縣徵

收漕米浮派雜費及僕役經承需索小民常例者嚴行禁止。犯者題叅究治。○康熙元年題准徵收糧米責成印官稽察不許顆粒囤存私家。如紳衿大戶仍因私家不行交倉者管糧官詳報總漕題叅。○四年題准各州縣徵收漕米如有淋尖踢斛剗削斛底改換斛面及別取樣米並斛面餘米者總漕各督撫嚴查題叅。○三十年題准州縣官侵隱漕項銀捏稱民欠冒請蠲除者題叅治罪。其失察之該管上司交部議處。○又題准州縣經承盜賣漕糧依律治罪。失察

之本管官照例議處○三十三年題准漕糧耗米例應徵收本色給軍如有私自改徵折色者各該督撫題參照私折漕糧例議處○五十一年題准州縣兌糧責令監兌官坐守糧道親到水次稽察儻有折收情弊發覺將該管州縣及領運官皆革職監兌官降二級調用糧道降二級留任所折之米照數追賠○乾隆十二年議准各省收漕時漁利之徒每借米色為詞暗地講串或裏折或外加甚至度量倉有餘米即以銀錢折色令總漕嚴飭各糧道加意訪查儻有

前項情弊嚴行懲辦。○四十一年議准。令有漕省分各督撫於收漕之時。嚴行訪查。明示曉諭。一切細碎潮溼之米。經管官不得濫收。如本屬好米。承辦官吏藉端勒捐留難。查叅治罪。○四十八年議准。浙江省各州縣糧多之處。每日完納花戶。多以萬計。小民爭先湧集。每易滋事。嗣後照江蘇之例。飭令各屬查明各該處區圖形勢。編立次第。先期明白曉諭。按次依限赴倉交納。仍遵定例。於十月內即行開倉交收。其收割較遲之處。令地方官查明分別辦理。○又議准。

辦漕地方官。往往瞻徇鄉紳情面。遇有巨户子弟家人完糧。或米色不純。或代人交納。每多有通融。復慮交兌折耗於民户。又多浮加。以致被人挾制。劣衿地棍。廣為包攬。甚有虛掣串票。並不交米。姦胥蠹役。勾結分肥。指稱耗費。向馴良花户勒索重值。復買交醜米。賤價折乾。並有豫先買米存倉。以為折收地步。迨至糶米納糧。又復講論價值。又有不肖官吏。浮收贏餘。改令折色。嗣後令將指紳巨户名下應完額糧。於糧冊內逐一註明。以杜包攬。並飭令印官親駐倉廩。

東公監兌責成該管道府稽查。儻有前項等弊。從重究辦。如道府瞻徇一併查叅。並將舊充漕總記書查明禁革。毋令復充。其營求收漕幕友長隨。概行屏絕。儻上司囑薦。許州縣據實揭報。每年收漕務須另選妥實書吏及親信之人。取結通詳備案。再州縣辦漕有派令漕書承應修倉鋪墊之事。及地方豪棍從中把持。不肖官吏畏其滋擾。分給規例。並各衙門承辦書吏亦有規例。甚至上司亦勒索分肥。弁丁到次受兌多方刁難。希冀陋規。令該撫董率司道實力稽查。

並於兌糧之時飭令糧道往來查察以清積弊。○五十七年定縣官於開倉之後糧戶輸納漸多並不親身臨倉以致書役斗級等任意拋撒埽集餘米不復給還糧戶將該縣革職拏問查出之糧道知府交部議敘。○嘉慶四年

論漕務積弊浮收折價及旗丁挾制需索幫船費用出運隨規並南帳北帳名目按款清釐逐條嚴禁可期漕務肅清惟尚有每年開倉之先即有本地紳衿包攬同姓花戶附入己產上倉交納圖占便宜或有以曾任職官品級等項分別坐得漕規即舉監生員之

刁劣者亦於中取利。州縣等懼其挾制不得不從而
於良善小民則肆意浮收無所顧忌。此當嚴行飭禁。
有漕督撫俱當一律查辦。但各省浮收之弊雖同而
費用之條不一。應澈底清查。將各幫應領應用及沿
途抵通經費隨規各行開列清單具奏。不得有蒙混
遺漏。總漕當實力整頓。糧艘過淮籤盤。途次派員催
趲。從前皆有使費。該督務須明查暗訪。永絕弊端。至
倉場侍郎於倉場諸弊亦素有所聞。其應行嚴查禁
止者俱當悉心察覈。毋任胥吏經紀等仍前滋事。然
不可操之過急。有意苛求。若於事有難行。必勉強於

一時其法亦不能經久。將來又成具文。總之州縣既向百姓浮收。旗丁自必向州縣加增兌費。總漕巡漕倉場各向旗丁層層索取。其實無窮之苦累。則我百姓當之。今將諸費禁絕。則旗丁用度不致竭蹶。何得復向州縣需索。而州縣既省兌費。又何得仍向百姓浮收。以收漕為彌補虧空者。亦不過州縣借此藉口。恐亦有名無實。現當整飭漕務之時。必須清其源。以絕其流。使閭閻實受其惠。而於旗丁運費。仍當籌畫周詳。不使稍形拮据。○又

諭有漕州縣。惟利改收折色。藉以分肥。往往於開徵時。

先將低潮米石搬貯倉廩名為鋪倉以便藉詞廩滿折收錢文其糧米之不能一律純潔亦由於此又民戶完納惟望早為收納從無躲避不前之事皆由官吏多方勒捐有意刁難以致民戶守候需時不得不聽從出費此與地方詞訟赴訴到官不肯速為審理拖延時日以為吏胥說合需索地步者情事相同地方官得受漕規以為賄賂權要逢迎上司甚至幕友長隨藉此肥橐運弁以挑剔米色為詞刁難勒捐及催漕運弁沿途俱有需索而抵通後倉場衙門又向弁丁等勒取使費層層剝削錙銖皆取於民最為漕

務之害。不可不嚴行查禁。著通諭有漕各督撫嚴飭經徵監兌各員。務將積弊革除。妥為經理。此後有仍前浮拆得受漕規。致正供米色撓雜不純。惟該督撫等是問。必當重治其罪。其漕運總督及倉場衙門。亦須一體嚴行禁止。此次通諭之後。若仍復蹈前轍。一經發覺。惟有執法從事。決不姑貸。○又奏准旗丁兌費。徵之於民。地方官既無賠累。應令糧戶自攬交納。並責成該管道府巡歷各倉。嚴禁踢斛淋尖折銀等弊。儻經訪聞。或被首告。官吏一併治罪。道府徇隱。並予題叅。上司收受陋規。照枉法

贓科罪○五年

諭米色為糧運最重。州縣開倉收米。自應一律乾潔。方可受兌。若水次米色不純。到壩焉有好米。向來各州縣多有折色浮收情弊。而不肖丁弁。又樂於從中需潤。以致米色參差。又江浙百姓。每以上等之米。留為自食。中等糶賣。下等完糧。此係向來積習。朕所稔知。近當漕務肅清之際。各糧戶得免浮收。所省已多。自應踴躍急公。將上等米色完納。何得尚將潮米充數。不以國家漕務為急。殊失尊君親上之道。著傳諭各督撫等。徧行嚴切曉諭各糧戶。交倉米色。務令一律

乾潔毋稍有潮雜。儻各州縣弁役有心挑斥勒捐。藉此需索。該督撫務當嚴叅治罪。不可姑容。○七年

諭近聞有漕省分尚不免有浮收。及得受漕規者。是積習仍未悛改。並聞各州縣往往於開倉時。逾額浮收。迨米數既足。遂私行折色。竟公然設局定價。並有於開倉之始。即先行折色。虛報滿廩。自用賤價買補。於兌糧時。兼有折兌之弊。而運員旗丁之勒捐。姦胥蠹吏之舞弊。劣衿刁民之把持。皆由此而起。其受累者。惟在安分良民。以天庾正供。徒為不肖官吏紳士等牟利之途。蠹國病民。莫此為甚。著傳諭有漕省分各

督撫督率司道等官嚴行查禁嗣後州縣官徵收漕糧概以本色兌收毋得仍前私收折色。儻敢仍前弊混一經查出即照枉法贓治罪。再聞州縣官於徵收本色往往以米色平常藉詞挑斥即實係乾圓潔淨者亦必多方勒指使花戶等守候需時百端苦累自不得不以折色改交。此次申諭之後伊等或有陽奉陰違於本色收倉時故意留難刁頓以為需索地步。此風尤不可長。並著該督撫等嚴行查察既不得改收折色亦不得於本色過事苛求違者嚴叅治罪。若該督撫不能實力訪查甚或有意瞻徇經朕查出或

被人參奏必將該督撫等一併懲治決不姑貸○又諭州縣徵收漕賦原應遵照定例令糧戶封銀投櫃閒有零星小戶聽從交錢者亦以便民若額定糧銀概行改折錢文則州縣以錢無定額任意加增朘削小民伊於何底著通諭各直省督撫嚴行禁革○道光

元年

諭浙省漕額較多其徵漕之杭嘉湖三府州縣與江蘇接壤其漕弊大約相似今欲返積重之勢先當去其已甚乃可徐議革除如該漕督等所奏幫費未能盡裁沿途陋規未能盡革浮收未能盡去在此時亦止

能如此辦理均即照所議旗丁幫費准其津貼銀三錢四錢不得有逾四錢之數其從前調劑錢米兌費加兌峯尖樣米各名目俱永遠裁革沿途陋規總須照舊有之數實加刪減至少亦須裁去十之三四州縣收漕每石餘米二斗五升無分紳士農民概以八折交收此外不得浮加顆粒此緣積弊已深一時不能驟革不得已且示以限制該漕督等當飭令實力遵行不可陽奉陰違仍期遞年量減漸復舊制在州縣責成該撫督率糧道知府等認真稽察在途責成該漕督董率糧道運官等嚴飭遵辦如有例外多索

之事各據實嚴叅懲辦毋稍瞻徇。○八年

諭漕糧為天庾正供州縣辦理不善往往為刁生劣監挾制始而包攬掇交繼而砌詞控告州縣因其刁健給予漕規藉以調停消弭該生監等視為故常止知索之於官殊不知官仍取之於民衿監多一人分肥即閭閻多一分苦累蘇州太倉松江常州等處積弊尤甚竟有勒索漕規至盈千累百之多並有一人兼索數州縣漕規者此而不嚴行懲辦何以甦民困而戢刁風著江蘇巡撫並有漕直省各督撫一體查察盡法懲治務期弊絕風清以肅漕政。○二十六年

諭

江蘇向來完漕紳富謂之大戶庶民謂之小戶以大戶之短交取償於小戶因而刁劣紳衿挾制官吏索取白規大戶包攬小戶小戶附託大戶又有包戶之名以致畸輕畸重衆怨沸騰紛紛滋事又旗丁津貼原有定額近來總以米色為詞多方挑斥逐漸加增是幫船多取一分於官州縣即多取一分於民種種弊端關繫匪輕若不及早整頓貽患何所底止著兩江總督江蘇巡撫認真查察所有前項大戶小戶包戶各名目概行禁絕一律均收尤不准旗丁額外多索幫費儻敢抗違不遵或州縣中竟有浮收入己情

事即行據實嚴叅從重治罪毋稍瞻徇以肅漕務而清弊源○二十九年

諭漕糧為天庾正供不容顆粒短絀封疆大吏尤當激發天良隨時整頓嗣後務須實力徵收全漕兌運儻各屬有捏災註荒及官吏私徵中飽州縣浮收勒折等弊必應嚴加釐剔其不肖州縣肆無忌憚如敢浮收勒折病民肥己一經查出即著指名嚴叅治罪毋稍姑容該管上司儻有意存徇庇者著一併從嚴叅辦○同治四年

諭前因江蘇蘇松常鎮太等府州屬額賦太重經該省

督撫等奏請裁減。按照全額計減去制錢四十萬餘千。當經降旨允行。惟江蘇積習已久。各州縣徵收漕糧之時。每有大戶藉詞抗欠。任意短交。致各州縣有所藉口。而裁減之惠。徒以供不肖官紳之賒削。而無益於民。嗣後江蘇各州縣開徵漕米。漕折不准復立大小戶名目。其包漕索規等弊。著一併永遠禁革。如有京外職官舉貢生監。仍藉大戶為名。與各州縣為難。營私抗玩。即著該省督撫奏請褫革。從嚴懲辦。該督撫務當督飭各屬秉公徵收。不准於例定折價之外。稍有浮冒抑勒。違則從嚴叅辦。此旨。即著勒石遵

諭山東有漕州縣按章徵收者絕少往往於官斗之外
倍蓰加收並立樣盤名目縱容蠹役格外剝削民間
視以為苦止得折價完納其浮收之數與完米增至
數倍者無異即或經該管上司查明減成完價出示
申禁該州縣並不張貼浮收如故東省如此他省亦
在所不免是浮收之弊例禁雖嚴而不肖州縣仍敢
視若具文誅求無厭以有限之脂膏充難盈之谿壑
積習相沿殊堪痛恨即著各直省督撫嚴飭所屬各
州縣肅除積弊各按漕糧定額一律徵收不准於正

額之外任意加增妄取。儻敢故違。即著各該督撫等查明嚴叅懲辦。

重運例禁。○順治五年題准。運官奉單領運。赴次違限者革職戴罪交糧。覈其完欠。奏請定奪。僉運退避者嚴拏究擬。○十年題准。領運弁軍中途侵盜漕糧。按律治罪。所欠漕米照數嚴催追賠。○十二年題准。衛軍水次承運。有衛官隨幫官常例。書識管家抽豐名色。州縣官知府同知通判及糧道漕院各衙門吏胥班役勒索陋規。並過淮攤派使費。沿途需索土儀及抵通過。

壩交倉船規常例。倉場坐糧廳書吏苛索使費。
飭令各該衙門盡行禁革。在外責成總漕總河。
各該督撫在內。責成倉場侍郎巡倉科道。協同。
釐剔。儻有前項弊端。立即題叅究處。以肅漕政。
○又題准。監兌漕糧事竣之日。監兌官將有無。
需索等弊。具結投送督撫存驗。事發。以溺職坐。
罪。○又定。重運盜賣漕糧。拏獲日。賣主買主。照。
偷盜漕糧例。從重處治。○十三年題准。水次將。
米折銀。罪在經徵有司。並監兌官。如過淮盤驗。
短少。將監兌官照例叅處。其嚴禁盜賣。令沿河。

各官具結呈報如糧船到通挂欠。審係某地方盜賣者。即將該地方官叅處賠補。○十五年題准。運弁領運漕船各有定數。如中途歸併帶運。冒支行月水腳等銀。按照缺船數目嚴追。從重究處。○又定。運弁領運漕糧有攙雜黑腐米石者。令倉場變價充賠。其挂欠者。照數嚴行追比。仍將運弁題叅重處。○十六年定。押運官串通旗丁盜賣漕糧。令總漕提究追賠。旗丁一體追究。買主從重懲處。○康熙二年奏准。運船交兌之初。專責糧道曉諭商牙。禁約運軍。不許夾帶。

私貨漕糧兌畢未開之先專責監兌官逐船按
檢糧道隨取監兌官查明並無夾帶甘結送總
漕總河倉場侍郎三處稽考如有犯者拏解糧
道呈報總漕題叅照律治罪○又題准沿途城
市鎮店貨物輻輳之所專責押運通判極力催
行不許停泊通幫前後不時稽察如稽察不嚴
即將通判題叅照例議處○又題准運軍包攬
客貨私載船內運官隨幫官嚴加稽察許於司
漕衙門據實出首免罪如隱匿不報一經查出
運官隨幫官加倍究擬運軍依律治罪○又議

准糧船經由地方。自水次至淮安。總漕同淮揚道盤詰一次。至濟甯。總河同濟甯道盤詰一次。○三年題准。官軍赴兌漕糧。爭索斛面酒席。恥辱糧官者。運官以故縱議處。運軍俟船糧抵通之日。嚴行究治。○五年題准。運弁侵蝕各軍月糧銀米。俟抵通交盤之日。倉場嚴審究擬。○又題准。運軍多收斛面入己。並運官知而不舉。皆從重擬罪。勒索之米。照追入官。○又題准。領運官弁勒索運軍飯米。擅扣行月公費等銀。及縱容親僕需索常例者。俟抵通交糧完日。令倉場

侍郎嚴提審追按律究擬○又題准舊例弁軍
爭告在未兌糧之先責令糧道嚴查不許領運
如在領運之後俟完糧回南日聽該衙門審理
嗣後有擅准運蠹呈詞拘繫新運幫官稽誤新
漕者照誤漕例議處運蠹嚴審究擬○六年題
准運弁自誤限期捏詞卸罪誣告官吏糧里者
依律擬杖○又定弁丁領運漕糧交納短少買
補全完查明或係水次折乾或係中途盜賣倉
場題叅議處○又定兌載漕糧如有水次折乾
並過淮不行查出及沿途盜賣將該管各官俱

照失察例議處。○七年定弁丁中途侵盜漕糧。水次折乾銀兩。並侵蝕席木等項。均按律遣戍。○又定運丁盜賣漕糧者。發邊衛充軍。以子弟代運者。遣戍。欠米著追。○八年題准。運弁領運全單。不填註支領糧銀月日。照疏忽例議處。○十一年題准。運弁私載客貨與己貨。及裝載私鹽者。皆革職。運軍私攬客貨。私載己貨。及裝載私鹽。運官失於覺察者。降一級調用。該管糧道不嚴禁者。罰俸一年。○二十一年題准。收兌漕糧。多攬糠粃砂土者。該管官革職。監兌官降一

級調用其抵通交兌漕糧米多糠粃及有砂土者押運官革職糧道降一級調用○二十三年定水手夾帶私鹽隨幫失察者降一級調用沿途各官並不盤查照例議處○二十五年題准紅剝船分運漕米如有用石灰泡水及藥水灌漲糧米者領運弁軍呈報倉場侍郎究審將運船人夫發甯古塔等處兵丁為奴其短少之米勒限著落正身船戶家產賠完如剝運米好弁軍勒索不收亦交刑部從重治罪○二十六年題准沿途催漕將弁縱兵勒索詐漕船以致運軍

畏避船米撞沈者革職嚴拏究擬○二十七年題准運弁需索運軍未遂不顧風浪逼船渡江以致漂沒漕糧淹斃人口照例治罪追埋葬銀給死者之家漂沒漕米仍著落該弁賠補○二十八年題准運官縱軍捉船剝淺漫無約束者題參照溺職例革職○二十九年題准運官縱令運軍搭臺演戲停泊不行貽誤漕運者照例革職○三十年題准運官不親運者將承委衛備及押運通判等官交部議處○又題准押運官沿途耗費漕糧妄稱同押官折收者勒追全

完仍照誣告律治罪。四十一年題准運軍沿途盜賣漕糧押運官弁失察者各降一級調用。○四十三年題准漕船重運入境責令沿河該管道府州縣往來巡察嚴緝盜賣失察盜賣一起者州縣官罰俸六月道府罰俸三月四五起以上者州縣官降一級調用道府降一級留任。若道府州縣能查實拏獲將賣糧買糧之人各枷一月示衆滿日責三十板糧米追交本船米價入官充餉運弁俟回南聽總漕捆打四十。○四十八年題准各省漕船除帶運鋪墊倉廩枋

木松板及每船土產貨物外如有民船雜於糧船幫內及將剝船改造大船夾帶私貨並船上堆置木植船尾拴縛木筏過關又違例多載私貨者總漕總河及糧道嚴查將該運弁題叅治罪○四十九年定漕糧在水次受兌上船之時糧道監兌官務必眼同照數兌足上船抵淮時總漕親身嚴行盤查過淮後沿河文武各官嚴催出境如不嚴行速催致弁丁有任意盜賣等弊將該地方各官交部嚴加議處○五十一年奏准每幫十船令各軍連環保結互相稽察如

有折收盜賣等弊。事發之日。本軍照例治罪。其餘九軍一同責懲。○五十七年題准。浙江省幫船。令分夾江南幫內。湖廣省幫船。分夾江西幫內。使彼此勢孤力薄。免致爭鬪。○五十八年奏准。江西湖廣兩省糧船。該督撫責令糧道押運等官。並地方文武官。於上流漢口吳城集貨馬頭。嚴加查禁。不許商民貨物私上糧船。亦不許運軍包攬私貨。取具糧道押運等官弁。並地方官甘結報明總漕。如違例私帶過淮盤糧時。查出貨物。照例入官。軍商皆從重治罪。糧道及押

運等官皆嚴加議處。○雍正元年覆准運弁管押重運擅自離幫及本軍在南託別軍包運並隨幫與副軍不親在幫押空以致遺棄漕船有誤新運者將弁軍從重治罪。糧道指名題叅。○又題准失風船到壩舊例驗其米色不堪起卸者准其賣銀買補嗣後如有不肖運軍乘機夾帶好米私行盜賣者令倉場坐糧廳不時巡察究治。若在南串通州縣倉役將米折銀或將原米盜賣掩飾過淮故買爛米充數者令總漕密加訪察將弁軍胥役從重究處該管官題叅。○

又題准漕糧不許顆粒上岸如遇過淺加夫止許照常給錢不得索米違者以盜賣盜買從重治罪地方官照失察偷盜例題叅○二年

諭朕惟漕運關係甚大經費本無不敷運軍恣行不法皆由官弁剝削所致如開兌之時糧道發給錢糧任意剋扣運軍所得十止八九而僉軍之都司監兌之通判又多誅求及至開行沿途武弁借催趲為名百計需索又過淮盤查私貨徒滋擾累究屬無益運軍浮費既多力不能支因而盜賣漕糧偷竊為非無所不至矣嗣後各省糧道給發錢糧不許剋扣分釐沿

途武弁不許藉端需索。運軍除包攬抗違外。所帶些
須貨物。亦毋容苛刻盤查。爾部行文各督撫。不時稽
察。如有仍前需索等弊。立即指叅。從重治罪。○三年
題准。運軍南北往返。必須食鹽。每船於受兌上
船處帶鹽四十斤。交卸回空處帶鹽四十斤。此
外多帶者。同私鹽治罪。○又題准。糧船攜帶火
礮鳥槍。一經查出。本犯照私藏鳥槍例處治。糧
道衛守備運弁。照失察例叅處。○四年題准。領
運弁軍。不諳漕務。封閉艙門。以致艙米黴變。弁
軍按律究擬。虧折漕米。勒限著落運軍賠補。不

完從重治罪。○又題准運弁兌漕勒索各屬經承者。斥革究擬。所得銀物追取入官。○五年題准漕米到淮盤驗潮溼徵變。將經徵州縣官照例革職。監兌官照溺職例議處。糧道不先揭叅照徇庇例議處。運弁混行收兌。照例革職留任。俟船糧抵通。令倉場侍郎按數稽察。如有虧折勒限賠補。限內不完。題叅革任追賠。○六年奏准運軍用水攬和漕糧。運弁徇隱不報者。革職枷示河岸。俟漕竣日釋放。運軍用大枷枷示漕竣日。僉妻發黑龍江給兵丁為奴。押運官弁漫

無覺察照例革職。○八年題准漕船到淮向有給管糧經承津貼飯食陋規嗣後定例大幫給銀六兩小幫四兩呈繳給發不許私相授受違者提究重處。○又題准漕船到淮飭各幫字識繕造米數軍舵姓名等冊不許總漕冊房攬造科派使費犯者嚴加究治。○又題准江浙兩省糧艘由鎮江出口方豎蓬桅舊例委催漕官就便查看不免需索嗣後俟過淮時總漕親加點驗至各省糧船總匯於揚州之三汊河例委幹員彈壓分幫如委官及跟隨人役需索盤費一

例參究。○又題准漕船渡黃汎弁不顧風色水勢妄行催趲藉端需索者照失於防範例議處致有疏虞加倍治罪。○又題准漕船渡黃河後提溜打牖內有弁兵串同人夫勒索運軍倍出工價陋規於重運北上時責令委駐營將約束禁止儻有縱容徇庇一併會參議處。○又題准漕船應領修艙銀例應照數給發運軍有需索使費陋規致運軍以朽腐船撞觸民船藉端索詐者即將該幫弁軍究處。○又題准運軍攬載客貨船重難行強奪民船剝載糧米者照水手

搶奪例治罪。其攬貨私得稅銀。並商民通同聽攬者。皆照違制例治罪。○又題准。正副二軍赴次交兌。如有革軍衿監。攬身入幫。即拏交地方官究治。若運弁不查拏。一併究治。○十年覆准。淮安府乃各省糧艘總匯之區。一應陋規。久經裁革。恐日久生弊。照通州石土二壩建碑之例。於盤糧廳後立碑一座。將裁革陋規刻石。永遠遵行。○又定。糧船偷買硝磺。多係沿河鎮集姦徒。豫為收囤。暗運入船。應於糧船將過山東時。該督撫豫於晉省私磺入境之處。令地方官弁

分路巡查。本省炤硝亦實力稽查。毋許囤戶偷販河干。暗送入船。並令揆查私鹽之文武官帶查炤硝。如查出私貨硝磺。亦照私鹽例究明查叅。押運官弁失察。照糧船夾帶私鹽例議處。十一年奏准各省漕船不許裝運無引私茶。如違禁攜帶。於過關時查出。即照私鹽例治罪。乾隆元年奏准糧船夾帶私鹽。多由土豪豫買私鹽窩囤河干。勾通售買。嗣後天津地方令巡漕御史後裁會同運使實力緝拏。其沿河地方令各督撫提鎮嚴飭沿河文武官弁。凡糧船經過。

時差兵役實力稽察。如有水手人等私帶貨賣。以及土豪頂買窩囤情弊。一面嚴拏按律究治。一面催船前進。毋得留難誤漕。儻徇縱失察。一經發覺。將督運押運官弁。以及前途失察之地方官弁。並失察豪強之地方州縣。皆照例叅處。其鹽除留食鹽外。餘皆入官。○三年奏准。運軍盜賣漕糧。頭舵工不舉。照不應重律治罪。受財者。計贓從重論。○又奏准。重運入境。道府州縣往來巡查。失察盜賣者。照例議處。沿河營弁失察盜賣漕糧。專汛千把。照州縣例議處。兼轄遊

守。照道府例議處。如專汛千把及文職州縣一
年內能拏獲二次者。紀錄一次。兼轄遊守及文
職道府一年內於所管內拏獲至四次者。紀錄
一次。再有多獲。照此遞加。至汛兵疏縱失察者。
革役。照不應重律杖八十。知情賄縱者。計贓以
枉法從重論。若能拏獲報官。審實將米仍歸本
船。其應入官之米價。追賞兵丁。○又奏准盜賣
漕糧。定例賣買之人。枷一月。責三十板。糧交本
船。價追入官。至運軍食米。向無禁賣之條。有將
漕米舂熟。假稱食米盜賣者。嗣後運軍多餘食

米於抵通交米之後方准變價如重運漕船沿途賣米不論糙熟皆照漕糧治罪○又奏准運軍不拘回空重運如有無故潛逃棄船中途不顧者照守禦官軍在逃律治罪外仍於面上刺逃丁二字示儆○四年奏准如有重運盜賣漕米回空之船代為承認者該管官察出將賣買軍民一併照例治罪○又奏准失察盜賣漕米合算米數不至五十石者仍照失察次數處分其失察一二次米數至五十石以上者將該地方官降一級留任道府等官罰俸一年失察一

起至三起合算米數至百石以上者地方官降一級調用。道府等官降一級留任。○又奏准各省受兌開兌之時令總漕密加察訪如押運官弁以及糧道等衙門吏役有科斂陋規幫規之弊即嚴叅究處並飭該管官不時嚴查有陽奉陰違者將與受之官軍等照例詳揭儻該管官徇隱不為揭報一併題叅。○又題准各省重運糧船例帶土宜一百二十六石分別貨物粗細酌量捆束大小定數作石於過淮處所立榜曉諭如有違例裝載以及書役人等勒捐需索嚴

加議處。○五年題准江廣等幫漕船多帶土產竹木沿途貨賣。其竹木於天蓬上裝載。毋得過高二尺。如有多裝。令押運官弁勒令起卸。嚴加責懲。竹木入官。○六年奏准糧道催米催船督押運船。凡差役滋擾之弊。定例皆經禁革。惟豫省提幫出運時。先發一牌。繼差一役。至衛提催不無滋擾。嗣後嚴行禁革。並飭各省一例遵行。○八年題准漕船如有失風事故。以致米色黧黯不純。驗明米色稍減。尚屬堅實。可以久存者。交倉受收。其所減成色米。責丁賠補。於次年搭

運交納○十七年奏准各幫漕船嗣後務須多用蘆席鋪墊艙底如有仍用石灰墊底無論米色是否潮溼查出即將運軍從重治罪該管各官一併議處每年過淮時總漕查驗取具各軍甘結存案○又覆准南漕除文武員弁陋規悉行裁革外其餘辦漕衙門無公項可動者酌量繁簡存留飯銀以資辦公鑄立石碑仍刊布各船通行曉諭押運承倖不時稽察儻有不肖員役私行婪索者即行揭報漕督及所在督撫查叅治罪其餘所減數目書役人等毋許額外需

索旗丁亦不許私行多給違者一併革處失察之押運丞倖及各上司交部分別察議。○十七年定旗丁沿途盜賣米石若係正項漕糧照監守本條從重治罪如將行月糧米零星盜賣盜買者仍照舊例各枷號一月其有一人盜賣及一幫盜賣數至百石以上者盜買及盜賣為首之人各枷號兩月折責四十板米交本船價追入官失察之運弁不及五十石者即令倉場捆打四十其五十石以上者降一級調用一百石以上者降二級調用二百石以上者革職。○又

定漕糧潮溼黴變致有虧折者押領官弁照例革職限一年賠補完日送部引

見請

旨開復不完革任追賠漕運總督失於查察照不應重公罪降二級留任例議處○十八年定旗丁短少漕糧米石沿途私行買補拏獲後將所買米石變價同鋪戶賣價一併解部短少米石咨南勒追搭運○十九年定漕糧雖非黴變而質嫩色暗不能一律純潔致難久存者押運員弁照例革職該管糧道不能豫先查出照豫先不

行查出例降一級調用。二十三年議准糧船例帶貨物一百二十六石。向來每多逾額。致令船重難行。嗣後行抵北運之時。即雇船先儘貨物起卸。不得稍有存留。二十四年奏准。湖南省運軍向係包給舵工。近年皆親身出運。然事例未諳。仍聽舵工指揮。旗丁有更換而舵工為世業。偷盜米石。侵蝕錢糧。及至抵通。交納不前。運軍揭債完公。舵工脫身事外。嗣後運軍抵通。交糧有少米五石以上。累衆軍通挪代完者。將舵工拏究。審出實情。咨部發遣。○又

諭聞各省糧艘北上。每遇過牘過壩及急流淺阻。必需人力輓拽者。沿河兵丁頗有把持包雇之弊。不獨旗丁深為苦累。而重運濡滯。未必不由於此。著傳諭漕河各督臣嚴行查禁。嗣後雇募緯夫。應聽運弁自為酌辦。如有兵丁藉端抑勒。以老弱充數。而橫索雇值者。即時拏究。並將失察之該管將弁題參議處。○二十九年奏准漕船重運回空。例帶食鹽各四十斤。經過查鹽處所秤出。僅止多二三斤者。不坐。仍將餘鹽變價充公。如再有多帶。照私鹽律科罪。○三十一年議准漕船沿途遇有淺閣。例應

先將所帶貨物卸載如仍虞重閣方許剝運米石。儻於貨物未經卸載之前先將漕米剝載即照旗丁盜賣漕糧例分別治罪。○三十六年定江廣兩省重運漕船交漕運總督於過淮時照例實力查驗其山東河南兩省各船交該撫轉飭該糧道一體察驗以杜幫丁私帶之弊仍令直隸總督每年遴派明幹同知一員屆漕船入北河時前往楊村會同總漕所派守備千總及運員等官嚴密稽查一抵楊村如遇淺阻令各幫丁先將貨物儘數起卸如尚阻滯酌量起剝

糧石毋致有誤回空。○又定漕船入北運河時
遇水淺阻即將所帶貨物全行起剝不得俟起
剝後再令停泊挨查。至各船所帶貨物查明如
在一百二十六石之外仍有多餘即為私貨照
例納稅。如在一百二十六石以內者仍照例免
稅。○三十七年定漕船例帶土宜於河西務查
驗起剝貨物時定以應免一百二十六石數內
覈計細貨粗貨各免六十三石。如有逾額多帶
之貨照漏稅例加倍徵收。旗丁治罪運員叅處
○四十一年定頭船尖下不許科派各船沿途

使費銀兩包攬侵蝕違者究處如運弁有串通頭船科派各船銀兩者分別究議○五十一年定守備圖受旗丁規禮欲令漕船起糾不行查報之該管上司糧道照失於覺察例降一級留任○嘉慶十三年定運糧旗丁因正項虧短買米回漕照漕運糧米監守自盜律數至六十石者發邊遠充軍數滿六百石者擬斬監候不及六十石者量減滿徒賣米之人發極邊煙瘴充軍旗丁所買回漕米石及賣米之人所得米價照追入官○十四年定船戶將領運漕糧偷食

偷賣攬和沙土。在一百石以下。依竊盜漕糧本例問擬。發極邊煙瘴充軍。聽從主使偷食偷賣者。減一等。杖一百徒三年。知情盜買。杖一百徒三年。飯食錢文。照追入官。○十五年定。偷竊漕米六次。在一百石以下。發極邊煙瘴充軍。為從杖一百徒五年。○十九年

諭糧船准帶土宜。本有一定斤重。原為恤丁起見。其例外多帶貨物。自應嚴行查禁。本年運河蓄水較淺。著漕運總督及巡漕御史。嚴行曉諭各運丁。不准例外私帶客貨。如有違例攜帶者。即於沿途起卸。仍將該

運丁照例治罪。務俾重運遄行。不致稽滯。○二十年
奏准。各省起運漕船。裝帶土宜。如遇水勢通暢。
船身喫水。按照加裝米數止。增重四五寸者。即
加緯行走。毋許脫空。○道光二十六年

諭。各省總運官及各幫運弁。皆以押運為美差。需索旗
丁。以致旗丁刁難州縣。任意搭帶貨物。運官等受其
餽送。即不能不聽其遷延。又沿途分段稽察之員。向
來派至數十人之多。在上司既藉以調劑。若輩遂任
意貪婪。更有沿途牘官於糧艘過牘時。按幫索費。俾
旗丁日益疲累。漕行日難迅速。實於運務大有關係。

著通諭漕運河道各總督及有漕地方各督撫隨時
密訪認真嚴查如有前項弊端立即指名叅辦毋得
稍涉瞻徇

欽定大清會典事例卷二百八

戶部

漕運

回空禁令

漕運雜禁

倉漕奏銷

回空禁令○順治十六年題准押空官串通運軍盜賣漕船提究追賠買主從重懲處○康熙三十七年題准江廣糧船回空之時總漕差委官弁在揚州儀徵會同鹽政後裁委員查驗私鹽如有夾帶即將押運官弁並失察各官一併題叅○五十一年題准漕船回空至德州桑園地方總漕選委能員協同德州衛弁按索私鹽並

飭地方文武官弁嚴拏窩囤。如有夾帶私鹽事發。將專委漕員。德州衛弁押運官弁。並該地方官題叅嚴加議處。○雍正元年奏准。回空船過天津關。長蘆巡鹽御史後裁會同天津鎮總兵官。親往驗放。至山東河南交界地方。總漕巡撫鎮將。差委知府遊擊等官按檢。如有夾帶私鹽。盡拋入河。失察各官。照例議處。○二年題准。回空糧船夾帶私鹽。不服盤查。持械拒捕者。分別十人上下。及傷人不傷人。各按首從依律治罪。其雖無私鹽。但闖關闖牆者。亦分別首從依律治

罪。若未闖關牘。但夾帶私鹽者。照販私律加一等治罪。○又題准。糧船夾帶私鹽。將販私地方之專管官降三級調用。兼轄官降一級。罰俸一年。押空之運官。照徇庇例議處。隨幫革退。其恃衆闖關。關牘及販私拒捕傷人者。押運等官革職。隨幫照例責革。○三年題准。糧船回空。凡經由產鹽處所地方文武官弁。晝夜催行前進。不許逗遛。並嚴拏囤戶串通運軍販賣私鹽。該管鹽務運司等官。巡察各場竈。不許夾帶餘鹽出場。如有徇隱疏縱者。叅處。○又題准。回空糧船

至揚州府儀徵縣向例總漕委官協同揚儀營汛並地方官按檢嗣後改於瓜洲江口令瓜洲營協會同江防同知按檢如有私鹽事發究明場竈地方並裝運上船日期將各該地方官失察職名題叅○又題准押運官兵一年之內該管幫船並無私鹽事故紀錄一次隨幫能拏獲首明私鹽三次及該幫三次回空並無私鹽事故者該管上司出具印結咨部以千總推用○四年題准漕船抵通完糧回日所餘行月等米向聽其沿途買賣嗣後全糧過壩之幫遇有賸

米必赴坐糧廳批照然後准賣。若未經給照擅行私賣私買者照例議處。○十年奏准回空糧船過山東時該撫豫於晉省私礮入境之處令地方官弁分路巡查。本省焰礮亦實力稽查。毋許囤戶偷販河干暗送入船並令按檢私鹽之文武官帶檢硝礮如查出私帶硝礮亦照私鹽例究明叅處。押運官弁失察照糧船夾帶私鹽例議處。○乾隆元年奏准漕船回空押運官弁多不隨船南下頭舵水手人等往往欺壓行船嗣後如遇回空糧船行兇爭鬪藉端將來往行

船阻留。捆毆商民等事。許沿河汛弁查明情由。及幫次船號運軍姓名。一面速令遄行。一面詳報總河。咨明總漕究治。○又題准。回空軍船所帶煤米。向無定數。嗣後江西省。每船留食米四十五石。煤四十石。湖南省。每船留食米三十六石。煤三十二石。湖北省。每船留食米三十三石。七斗五升。煤三十石。江浙每船留食米三十石。煤二十五石。自通州至宿遷淮揚等處。逐關查驗。扣除免稅放行。不得越數多帶。巡役人等亦不得勒索留難。○三年定糧船回空。令沿河督

撫總漕倉場轉飭天津河道押運員弁嚴查除
日用盤費錢文准其攜帶外如有將制錢裝載
數十串捏稱壓船希圖販賣者即行拏究儻胥
役人等藉端需索亦即究治○六年奏准押空
隨幫一年之內並無私鹽事故者於補官日紀
錄一次○七年奏准薊運回空行令直督轉飭
薊州文武官弁俟糧船抵薊卸糧之後即催回
空不許在該地方創取白土裝載上船並令出
示曉諭沿河各市鎮鋪戶人等不許將白土賣
與糧船致滋攙和情弊嗣後如經關口汛地查

出薊運回空帶有白土。並兵役人等遇有糧船偷買白土。拏獲審出實情。將該運弁與押運千總。皆照運軍攬和水米。運官不行稽察例。革職。其該船軍船照運軍使水攬和發遣例減一等。杖一百。徒三年。偷賣白土之軍舵同罪。將白土攬入漕糧至百石以上者。即照攬和水米例發遣黑龍江與兵丁為奴。知情買賣之鋪戶。照違制例。杖一百。枷號一月。發落。不行查禁之薊州文武官弁。照出洋商船私帶軍器。地方官不嚴行禁止。例。罰俸一年。○十四年定。天津淮安儀徵等

處產鹽之鄉貧難老幼遇漕船經過充塞河干負鹽售賣令督撫轉飭地方營汛官弁嚴行稽查毋許老幼男婦隨船貨賣其舵工水手應需食鹽止許向官鋪售買每船不許出定例四十斤之外如多帶私鹽即嚴拏究治若不實力稽查照例議處○十六年覆准各省回空漕船不許夾帶鹽斤是以淮安揚州地方委員按查至鳳中長淮等幫回空船隻並不經過淮揚有在夏鎮兌運亦有由黃河洪澤湖赴次受兌者應令大河衛守備駐紮黃河北岸俟不過淮之徐

州江北輪兌徐漕之長淮三四兩幫回空到日。按查冊報。其在夏鎮阜河等處受兌之淮安三幫船隻。委濟甯衛守備就近按查冊報。○二十年覆准。同知通判管押回空漕船。果係親身在幫。協同營員按查。並無夾帶私鹽者。照例議敘。若未經在幫協查者。不得請敘。並令於造送按鹽文冊時。將總押廳員姓名。曾否在幫。據實登註。以憑考覈。○二十四年定。領運千總交糧後。領到完呈。私自回家。並不趕幫協同督丁南下。又扣留回空身工飯米。並任匪舵偷竊食米。盜

賣什物照溺職例革職○二十九年議准揚州
查鹽處所每年總督鹽政委員實力辦理糧船
一到隨即檢查大幫一日一幫小幫一日兩幫
查畢即促開行其淮揚道揚儀營及江甘二縣
兵役檢查一概停止○三十一年定回空漕船
俱有帶回土宜貨物如船隻無多隨時驗放儻
幫船到關號數繁多挨次覈實稽查以重稅課
亦不得故為留難以致漕船歸次遲延仍令將
糧船到關過關日期知會各該督撫以備查覈
○四十二年議准回空漕船除不須打造者行

抵牖外。停讓重運。不准過牖。其有滿號打造船隻。必須趕廠所興工者。責令糧道查明確數。先期造冊詳明。漕臣轉飭河員。於每幫出口後。乘空分塘照料進牖。每起進船。不得過五隻。於船尾粉書赴廠打造字樣。重運尾幫出口後。即令先行赴幫進牖。如河內重運連檣行走。回空船隻。即於河面寬處暫行停讓。至重運盛行。回空將到之際。仍責令該管廳員駐宿河干。專司彈壓。道員往來稽查。儻有搶牖等事。並牖官故意留難勒掙。該督撫立即據實指叅。○道光七年

奏准產鹽之區。向有跟幫積匪。勾串地棍土梟。先期販運。豫囤水次。候回空過境。沿河上載等弊。嗣後令直隸山東江南督撫鹽政嚴飭查拏。以杜收買。

漕運雜禁。○順治十二年定。旗丁挂欠漕糧。坐糧廳必究其根由。如係本地折乾。並追折乾之人。監兌官一同治罪。如係途次盜賣。並追水手及盜賣之人。該地方官一同治罪。○十四年題准。領運弁軍。如有藉端擾害過往官商船。及恣橫生事者。督撫鎮道等官嚴拏。照營兵鼓譟例。

先從重懲治一面題叅送刑部究處○康熙元

年

諭糧船經由漕河領運官軍依限抵通回空方為盡職
無罪○乃有姦頑官役不守成法多有夾帶私販貨物
隱匿犯法人口倚勢恃力行兇害人借名阻礙河道
毆打平人託言接尋失物搶劫民船且有盜賣漕糧
中途故致船壞以圖貽累地方種種姦惡督漕各官
並該地方官一有見聞即行叅奏務將官員嚴提治
以重罪○若知而徇隱不奏亦從重處治○四十一年
定京城私錢皆別處買來偷載運糧船內帶至

京城發賣。有漕督撫務嚴飭該管官於開幫時
確查。過淮時總漕確查。其不過淮之山東河南
糧船。該撫飭該管官確查。如不確查。或被拏獲
或被首告。將該管督撫總漕糧道押運等官。俱
交部嚴加議處。○六十一年題准。糧船頭舵水
手。有砍伐官柳。拆毀緯橋。拔椿掘埽者。嚴提治
罪。估價追賠。押運官弁及地方文武各官。並加
叅處。○又題准。水手夥衆搶奪十人以上。執持
器械者。首犯照強盜律治罪。為從減一等。十人
以下無器械者。照搶奪律治罪。出結之運軍及

頭工舵工容隱不首。照強盜窩主律分別治罪。
○又題准押運領運各官弁例。應嚴押漕船母
許運軍舵工水手登岸生事。如有不法。即會同
地方催糧各官協拏究治。儻平時漫不約束。臨
時又復容隱者。總漕指名題叅。照例革職。○雍
正元年

諭江南浙江江西湖廣山東河南各省總督巡撫漕船
關繫緊要。除本船正副運軍外。其頭舵工水手皆應
擇用本軍。庶各知守法。不敢誤漕生事。近聞多雇募
無籍之徒。朋比為姦。不服運軍彈壓。當漕糧兌足之

後仍挨延時日。包攬貨物。以致載重稽遲。易於阻淺。不能如期抵通。及同空經產鹽之地。又串通姦頑。收帶私鹽。此其弊端之彰著者。聞尤有不法之事。凡各省漕船水手。多崇尚邪教。聚衆行兇。一呼百應。邇年以來。或因爭鬪傷害多人。或行劫鹽店。搶奪居民。種種兇惡。漸不可長。亟宜懲治。爾該督撫。即嚴飭所屬各衛所。嗣後糧船務於本軍內擇其能撐駕者。充當頭舵工水手。不許雇募無藉之人。更嚴禁邪教。諭令歸業。務為良民。如仍怙惡不悛。該地方官不時查拏。從重治罪。如奉行不力。即將該管官弁指名題叅。○

五年題准姦徒專放糧船私債舊例許運官並
運軍自首照私放官債加等治罪嗣後有違禁
取利盤剝運軍者責令地方文武各官及坐糧
廳立拏究治如地方官坐糧廳不即嚴拏及該
管運弁縱軍私自借債者一經發覺皆交部嚴
加議處○八年定運弁需索旗丁蓬稅銀兩又
需索各船裝帶土宜銀兩及旗丁銀米銀兩者
革職僉妻發邊衛充軍○十年覆准漕船損壞
皆因運河水道舊址積年淘卸衝激日就窪下
舊存石塊木椿淹沒水底糧船過此一經抵觸

多致損壞。應嚴飭沿河鎮道等官。於水落之時。沿途細勘。凡有阻礙。悉行起除。儻起除不淨。抵觸漕船。總漕並巡漕御史。將該管河道等官。題叅議處。○又定運弁藉書役飯食。額外多索旗丁飯米。照因公科斂例革職決杖一百。○十三年

諭朕聞南方濱江兩岸。多係蘆洲。民間將蘆葦堆貯洲上。賣以度日。而江楚及上江各幫漕船。由江經回。竟有不法水手。每遇蘆柴堆積之處。輒糾集多人。蜂擁上岸。恃強奪取。洲民攔阻。動輒毆詈。甚至有強取難

鴨等物者。小民畏勢。莫敢與較。水手肆行如此。運弁即坐本幫糧船之內。安得推為不知。至督運之糧道。押運之府佐。雖云統轄衆幫。亦當留心稽察。何得任其多事。著漕運總督通行曉諭。儻有仍蹈前轍者。經朕訪聞。必將大小文武運官。分別嚴加議處。○乾隆元年。覆准糧船水手。遇有事犯。如已經離船。以及未經上船之先者。不得拖累運軍。如有棄差逃走者。令在押運通判處。十日一次呈報。○三年。定小船受雇裝載盜賣漕糧。拏獲之日。照賣糧買糧枷責例。減二等發落。○四年。奏准催漕。

弁兵需索運軍銀錢土物者經該管上司及巡漕御史查出係兵將該管千把照失察衙役犯贓例議處係汎弁將該管上司照不揭報劣員例分別議處需索之弁兵計贓以枉法論土宜禮物照挾勢豪強之人接受所部餽送土宜禮物受者笞四十與者減一等律分別治罪贓物給還如兵弁需索運軍或運軍行賄而押運官不即申報照應申報上司而不申報例處分如知情故縱照以財行求律受財者與以財行求之運軍一同治罪追贓入官如運軍被索即時

首告免罪。追贓給主。其贓少首多。或因催行挾私誣首。照誣告律分別治罪。如不行首告。仍照以財行求律。與受同科。贓物入官。催漕兵弁遇有運軍行賄。據實呈首。免其治罪。追贓入官。運軍照以財行求律治罪。○五年覆准。糧船沿途提溜趕幫。雇用短絳。每夫每里。給制錢一文。打牓每船用夫一名。給制錢一文。如牓壩水急難過。夫役守候臨時酌增。催漕兵役毋得藉端需索。至人夫雇價。給予現錢。毋得以貨抵給。如有兵役夫頭。派加短絳。多索夫價。從中取利。貽害

運軍者。照霸占損擡。分外多取雇值。不容本家
雇人者。枷兩月杖一百例。治罪。該管官弁自行
查出懲究者。免其叅處。如漫無覺察。照失察衙
役犯贓例議處。其扶同徇隱者。照縱役犯贓例
革職。○又奏准各幫頭船運軍。有借沿途使費
名色。科派各船。包攬侵蝕之弊。應專責運弁稽
查。如運弁串通頭船運軍。科派各船者。照因公
科斂律杖六十。贓重者坐贓論。若分肥入己者。
計贓以枉法論。如運弁知情徇庇者。照縱容衙
役犯贓例。革職。其失於覺察者。照失察衙役例。

分別議處。○七年奏准漕規諸弊均有嚴禁之例。惟恐日久弛玩。刊刻木榜列於瓜洲。牘口。儀徵江口。淮安盤糧廳。濟甯臨清。天津。通州各口。俾往來弁兵觸目儆心。仍令該管官不時稽查。如有干犯。照例提叅究處。○八年奏准運軍正身不押運者。將承派運軍之衛守備罰俸一年。領運守千。徇私不稽查者。降一級留任。惟隨幫武舉向無責成。嗣後領運官弁徇私縱容代運隨幫。知而不報者。照應申上而不申上律議處。

○二十三年

諭各省糧船抵通除交倉全完外所餘食米俱由坐糧廳衙門給予照票俟回空時於天津一帶沿途售賣而通州水次則例應嚴禁私糶蓋因通倉為兌米之地恐夾雜影射致滋弊端若漕米均已不致挂欠其餘贍食米自可聽其在通出糶不必過為苛禁在各運丁等既可免領照驗票之煩而通州米石充裕於京師民食亦屬有益○又議准糧船空重千總各准帶鳥槍一桿以備巡守漕督編列字號責令空重千總自行收存如有私行夾帶者照例議處○又定旗丁盜賣餘米雖各出己資自買自賣

非正耗糧米。該運弁仍照失於查察例罰俸一年。四十一年議准。糧艘過淮。總漕眼同弁丁逐船比對。務期米色一律純潔。方准過淮。安徽江西湖廣等省。監兌官例在水次驗兌。如係糧道親身督押。及押運廳員千總等官督率照料。查係原兌本屬好米。中途不勤加風。賒甚至舞弊。攙和。皆非監兌官所能查察。止即將在幫各員叅處追賠。其江蘇浙江二省。係監兌之員押運抵通。儻查係原兌米色本屬平常。即將經管各員及監兌押領各員弁一併嚴叅議處。仍分

別立限追賠其過淮以後已屬驗明好米如有
以微暗之米交倉則係弁丁等不勤加風瞭所
致除將該員弁叅處外並將不堪之米石著落
追賠○四十五年定旗丁沿途盜賣漕糧正米
及盜賣餘米俱從重改發黑龍江給披甲人為
奴知情不舉之領運千總發邊遠充軍失察盜
賣之運弁革職糧道總運等官交部議處○四
十九年

諭漕運旗丁官給席耗折色等銀兩原為各該旗丁歲
修及各項雜費之用乃全行扣存並將每丁行月糧

違例扣賣。重利盤剝。又私扣各丁銀兩。餽送運官。於漕務大有關係。此等情弊。各省幫丁俱所不免。著漕運總督嚴飭各省糧道一體實力嚴行查禁。○又奏准旗丁應領津貼銀錢。每幫每船係銀足兌實封。鈐貼印花。係錢足數捆紮。令各該糧道親身放給。運弁旗丁眼同支領。不得假手家人書役。儻有需索剋扣。許旗丁赴督撫衙門首告。按法叅辦。○嘉慶五年

諭。漕船經過地方。向有無賴棍徒。勾串漕船水手。沿途滋事。著沿途文武地方官。於漕船經過時。多派兵役。

認真查拏。務令棍徒知所畏懼。豫為斂迹。儻以後仍行疏縱。致棍徒水手再有勾串滋事之處。著漕運總督即將該處文武地方官嚴叅治罪。○二十年奏准運糧漕船如有姦商借給銀兩。重利盤剝致累運丁。由糧道督率運弁隨時查察。立即嚴拏懲辦。○道光五年奏准各省幫船水手有拜師授徒。聯結夥黨情弊。務於各幫盤驗時詳加察訪。並令每年於開行時。出具本幫弁丁不敢容留匪徒。鈐甘各結呈送察覈。○八年奏准各幫老官師傅責成糧道。督同運弁及地方官根查確

實。無論曾否滋事。按名拏獲。解交原籍地方官。取具鄉約地方保結。嚴加管束。不准外出。仍以水手老官四字刺面。按月點驗。並責成重空運弁隨時查訪。如再有老官師傅名目。把持一幫。水手入教。聽從指揮者。即行嚴拏送官。其老官師傅以教首本例論。其拜師入教者。以習教本例論。儻幫弁姑容。查明嚴叅。○又奏准水手每指防夜為名。藏匿兇器。務嚴飭幫弁於出運前。按船按查淨盡。仍飭令丁舵時時防範。如有藏匿。即時稟報。究明來歷。嚴行懲辦。若知而不舉。

丁舵一併從重究辦幫弁姑容即行嚴叅○又
奏准每年各幫船於開行後向有無藉匪徒隨
幫播弄是非名為放散風每於昏夜勾串各幫
水手朋比為姦嗣後責成各船舵水手如遇此
等匪徒到幫即潛稟本官嚴拏究辦儻姑為容
隱即係意圖勾串滋事本船旗丁即時稟報幫
官一併查拏懲治仍嚴飭地方官隨時訪獲嚴
辦○十六年奏准漕船水手不准私藏刀械開
行以前糧道幫弁及地方文武在水次查控重
運過淮漕運總督查控抵津回空直隸總督轉

飭天津道督率地方文武及總運幫弁查按黨
有私藏刀械嚴行究辦如按查不力指名叅處
差役徇庇從重治罪○又奏准漕船隨帶鐵匠
如代水手打造兇器該管幫弁密稟糧道及總
運官會同地方文武將鐵匠水手一併拏獲治
罪儻幫弁徇隱從重叅處○又奏准各省軍船
如有議定包費將船隻託人運通交卸情弊將
該丁按律治罪衛弁從重叅處○二十二年奏
准漕船抵壩後不准水手人等一名留住通州
由漕運總督派把總一員前往通州會同各該

衛千總認真稽查。責成該衛千總等及地方官。查明出結。詳報直隸總督順天府查覈。

倉漕奏銷。○順治十二年題准。輕齋由牘席片板竹行月等項。一應隨漕錢糧。經管各官。遂款備造舊管新收開除實在清冊。在糧道者。總漕按年奏銷。在坐糧廳大通橋者。總督倉場侍郎按年奏銷。○又題准。漕糧徵兌。總漕派發全單。取造軍衛有司額漕數目報部。如有未完。即行指叅。○康熙二年題准。輕齋席片松板楞木本折錢糧。出運減存行月銀糧。漕贈銀米。過湖淺。

船倉米副米並修造漕船淺貢運官廩工民七料價六升米折及蘇松常鎮四府協濟壽淮揚鎮等倉米麥銀此等漕項錢糧均取在地畝銀米內支用備辦舊例各作分數考成嗣後總作十分總漕每年造冊奏銷○十五年題准江南江淮興武等幫水手銀總歸江安糧道催徵給發造冊呈送巡撫奏銷○又奏准江甯衛本折行月總歸江安糧道管理○十八年題准德州倉額徵本折米麥歸併糧道專管報銷○二十三年奏准奏銷冊籍將支用款項總散數目分

析開造。如有款項不符。混行造冊題報。該管督撫照蒙混例處分。二十四年題准。臨清倉應徵米麥各屬相距甚遠。解送維艱。嗣後折徵解倉支給報銷。二十六年奏准。存留項下錢糧。在本省支用。並支贖者。不作分數。隨起運數內造冊奏銷。二十七年題准。江南省減存行月廩工備料小料等項銀。照江西湖廣之例。停其解淮。徑解江安。蘇松糧道歸漕項奏銷。案內題報。二十九年題准。河南省額解臨清德州二倉錢糧。歸驛鹽道兼理。其奏銷考成。該撫於年

終具題。○三十一年題准。德州倉奏銷考成。於
次年五月內依限奏銷。○三十二年題准。蘇松
所屬州縣額徵加漕裁扣六升等銀。原係供支
蘇松漕糧運軍行月之需。舊例解交江安糧道
給發報銷。今酌定解交蘇松糧道。總作完欠支
給奏銷。○又覆准。淮安。徐州。鳳陽等三倉徵收
米麥豆各州縣。離倉路遠。往返盤剝。官民受累。
嗣後照漕折定例折徵。徑解糧道支給。○三十
三年題准。各省漕項錢糧。向係總督隔年奏銷。
嗣後照地丁錢糧之例。於次年五月奏銷。○三

十五年題准漕糧十月開徵。至次年九月方滿。與地丁不同。嗣後仍照舊例。隔年三月奏銷。又題准臨德江甯淮徐鳳陽等倉編徵行月銀及米麥原為供支運軍廩糧之需。江甯德州二倉統入漕項奏銷。其臨清倉月糧淮徐鳳三倉行月錢糧總漕照例於隔年三月別案題銷。五十二年定臨清倉交與山東巡撫專管。其倉項錢糧照監督例扣算。一年任滿奏銷。六十一年題准奏銷本年錢糧。將上年存賸錢糧作為舊管。本年已完錢糧作為新收。仍將舊管收除。

別造簡明清冊送部。○雍正七年題准。漕白二糧奏銷。及通濟庫錢糧奏銷。向未定有限期。今酌定於次年五月內造冊具題。○十一年題准。江甯。淮安。徐州。鳳陽。四倉錢糧奏銷考成。舊例該管督撫於次年五月具題。今展限一月。江甯。淮安。鳳陽。三倉。均於次年六月內題報。徐州一倉。江督仍照原限奏銷。○十二年奏准。漕項奏銷。部覆駁問數項。向例扣限四月。按款咨覆。未完錢糧。扣滿年限咨參。雍正十年部議。將漕項登答。改為一年一次具題。未完銀內續完數目。

令其歲終彙報。並造入下次奏銷。新收春秋季冊之內。案牘紛繁。彼此牽混。轉難查覆。嗣後仍照舊例。其節年未完錢糧。續完若干。仍未完若干。並動用存儲各數。該省分別造冊。別繕題本。隨本年奏銷。一併題報。○乾隆五年。覆准浙江省漕項奏銷。向將本折月糧廩工永減淺貢及本色行糧漕截等款。列為一冊奏報。漕糧改折灰石等款。單列一冊奏報。輕齎行折等款。列為一冊奏報。嗣因月廩淺貢永減漕截灰石及漕糧項下本色月糧支贖本折銀兩同灰石等款。

統改每年二月開徵。因將向附月廩等款冊內之本色行糧一款。改入輕齎行折冊內。統算考成。六年覆准。各項錢糧未完續完銀米支解數目。例應造入隨本節年奏銷案內。惟漕項續完支解數目。或於道府年限案內造報。或於州縣年限案內造報。未免錯綜無定。嗣後本年奏銷行查各款。仍令於本年奏銷案內。聲敘歸結。其歷年未完項下續完支解數目。照例造入隨本節年奏銷案內具題。毋庸造入年限案內報部。○十五年議准。蘇松漕項奏銷。向止係將起

運數目題報。未將額徵漕糧造入嗣後照江廣之例另造一冊彙入漕項奏銷內具題查覈。十六年議准地丁漕項原屬兩事。各省遇有地丁展限。其漕項自應冊報候撥。僅因地丁展限漕項清冊有礙難造報之處。即於展限文內聲敘緣由。註明漕項一體展限字樣。豫期報部。以便於撥冊聲敘。若咨部展限文內並不聲敘。及清冊逾限不到者。戶部照例題參。十九年議准搭運緩漕給丁漕贈銀米。務於隨奏案內按年造報。毋得於奏銷案內開除。致滋重複支銷。

之弊。二十年議准。漕項隨奏年限各冊。將上屆冊報某州縣衛某某等款共銀若干。彙結一總。內已完若干。未完若干。併列一條。米豆麥石亦各結一總。登報完欠。又議准。向來漕項錢糧造報奏銷。係按照原額。將節年升增。並州縣完欠。以及裁減官丁應扣行月俸廩各數。逐款臚列。甚屬繁冗。嗣後奏銷案內。以上年實增之確數。即為下年之定額。再將本年升增各數。隨款登明。至各項款目。止開列奏銷冊首。銀米各彙結總數。統收統除。應扣行月俸廩等項。歸入

實存項下不必每款分列。即州縣實徵冊內凡銀米完欠亦止各列一條。府總道總一律如是。又隨案年限案內州縣完欠亦仿照辦理以歸簡易。又議准奏銷案內動用錢糧有應俟別案題銷之日報部查覈者。僅別案或因他故駁查。每致奏銷案內屢次登覆。嗣後應歸別案完結之項。若動款數目既已相符。此案即予銷結。○二十二年議准糧道帶印公出不能依限奏銷。例得展限。仍將不能依限奏銷緣由附疏聲明。○二十四年議准山東省各幫行月半折銀

兩俱由糧道支發。獨山東前幫等四幫。派令臨清倉給領。每年由臨清倉鈔送底冊。糧道彙覈造報。殊多牽掣。嗣後該倉每年支給山東前幫等幫行月銀兩。歸併糧道。與通省幫船畫一支放。仍將收支銀兩數目。同臨清州造報收支米石數目。繕造黃冊。由山東巡撫彙覈奏銷。又議准山東糧道庫大使兼德倉事務。向令經管漕項及德常二倉銀兩。嗣將臨倉錢糧歸併糧道經管。亦須該庫大使支放。勢難兼顧。所有德倉本色米石。併歸常豐倉大使經管收放。仍令

該道循例各歸各款辦理。分析該二倉名目造報奏銷。毋致牽混。○二十六年定。江西省應徵加增餘租。分給幫船。造運銀兩。報冊照漕項錢糧隔年奏銷之例。造冊送部覈銷。○二十八年議准。山東省東昌府屬之聊城堂邑等十八州縣漕糧項下。額徵鹽鈔銀一千四百三十七兩一錢一分零。內堂邑博平莘縣冠縣館陶高唐邱縣恩縣等八縣。係徵解糧道給軍。由糧道報銷。其聊城茌平清平臨清夏津武城濮州范縣觀城朝城等十州縣。向解東昌府支給軍丁嗣

經部議將聊城等十屬額徵鹽鈔裁充兵餉俱由府轉詳解部銀數無多專委人員甚費周折所有聊城等州縣解部鹽鈔一項即照堂邑等屬解交糧道湊支軍丁各項錢糧之用彙入漕糧項下一併造冊報銷。三十一年議准各州縣衛應徵錢糧銀數尾零以釐為斷米麥奇零數目以勺為斷五毫以上者准為一釐不及五毫者悉行減除米麥豆石尾零五抄以上者准為一勺不及五抄概行刪除其州縣由單前列細款仍存其舊以符賦役全書魚鱗冊籍之款如官吏

借歸併之名。浮收滋弊者。查出從重叅處。○三十
十二年定。浙江省漕項錢糧。係地漕統徵。同時
分解。令各州縣將徵有地漕若干。於起解藩司
糧道文內。一併報明銀數。司道衙門互相查考。
○三十五年議准。豫東二省留儲薊糧。動撥米
穀。及出借徵還各數。每年年底清查。造具管收
除在清冊送部查覈。統歸糧道一處實力稽查。
造冊該撫覈實奏銷。仍將存倉米穀數目移送
藩司。以備急需動撥。藩司衙門毋庸重複奏銷。
○四十一年定。山東省實徵漕糧。並改徵黑豆。

係春兌春開河南江南浙江江西湖廣等省實
徵起運漕白二糧並改徵小麥黑豆係冬兌冬
開每年各糧道將兌收各數出運日期造冊呈
報漕督彙總具題○四十八年議准江西省餘
漕銀兩照正項錢糧之例改為題銷○五十三
年定各省耗羨銀兩與正項錢糧同時造報並
於耗羨冊內載具正項銀數如有未完聲明是
否隨正未完及正項錢糧內有不徵耗羨者亦
於正項錢糧冊內逐款登明以便考覈○又定
江西省漕項耗羨銀兩向係年清年款並不隔

年奏銷今改歸總漕題銷自應詳報總漕覈題並於奏銷時將應徵正銀若干隨正徵收耗銀若干細數造冊附送備查○五十四年定江西省隨漕屯糧並正副米石例係隔年三月奏銷所有耗羨冊籍於奏銷時隨同正項造冊詳報總漕覈銷○嘉慶二年定漕項奏銷初叅案件向係具題嗣後復叅之案亦應具題以昭慎重○十一年覆准山東省臨清倉項下支給臨清東平三衛所本折月糧銀米向係專案造冊題銷又造入漕項奏銷冊內係屬重複嗣後仍照

向例專案題報漕項冊內毋庸造入。○十四年定漕項奏銷各屬應造清冊如屆限期有造冊遲延者即隨案題參。○光緒十一年奏准江蘇省阜甯清河桃源宿遷海州沭陽贛榆等七州縣徵收漕價銀兩既係漕糧改折每屆冊造仍按照各省漕糧一律辦理嗣後遵照例限造具完欠四柱清冊其歷年未完項下續完支解緩徵各數目照例另造冊籍入於隨本奏銷內題報查覈。○十二年奏准嗣後漕項奏銷務於隔年三月到部即奏請展限亦不得過三箇月逾

限者由戶部專案奏參。○十三年奏准江西省
餘租奏銷向係隔年六月內造冊具題。兵燹以
後未能依限造送。嗣後比照漕項奏銷之例於
隔年三月具題。毋得率請展限。